

四庫全書

經部

欽定四庫全書

經部

周易辨畫卷三十四
五

詳校官給事中臣丁雲錦

通政使司副使臣莫瞻菴覆勘

總校官庶吉士臣倉聖脈

校對官中書臣牛稔文

謄錄監生臣王宜

欽定四庫全書

周易辨畫卷三十四

潁川連斗山撰

繫辭上傳上

天尊地卑乾坤定矣卑高以陳貴賤位矣動靜有常剛柔斷矣方以類聚物以羣分吉凶生矣在天成象在地成形變化見矣

斷丁亂切
見賢遍切

此節先儒俱謂聖人因造化之自然以作易上截是

說道理下截是說易書但玩上截所言不似說道理
亦似說易書且下數節俱係說易書不應此節泛說
道理也蓋此書之別于夏商者全在以乾坤開首故
夫子開口即以此贊之言周易之首乾坤何所本乎
嘗按諸先天圖乾為天而尊于上坤為地而卑于
下天尊地卑萬物生于其間此不易之經也唯其不
易故易之首乾坤于此定矣乾坤之卦既定其六爻
由卑而高以次陳列

畫卦自下而上

居上者為貴居下者為

賤貴賤亦于此位矣乾主動坤主靜各有常也而其
中之奇畫即為剛偶畫即為柔剛柔又于此斷矣不
但此也乾居南方坤居北方純陽純陰雖以類而相
聚而乾為陽物坤為陰物或正或不正若于羣而有
分有分則正者為得不正者為失而吉凶并生于其
間矣然且在天成象有龍馬而龍有潛與飛之異在
地成形有馬馬而馬有牝與牡之殊有異有殊而剛
化為柔柔變為剛亦見于是矣乾坤之所包如此

此

祇就乾坤
二卦言

是故剛柔相摩八卦相盪鼓之以雷霆潤之以風雨日月運行一寒一暑乾道成男坤道成女乾知大始坤作

成物

摩末何切盪唐
黨切寔徒鼎切

且乾坤二卦豈徒自成其乾坤已哉是故乾雖剛也
摩以坤之柔則乾為天地否矣坤雖柔也摩以乾之
剛則坤為地天泰矣再加摩焉一卦可以成八卦更
加盪焉而震雷艮寔以鼓之巽風兌雨

艮寔兌雨
本虞氏易以

潤之且離日坎月以運移而推行之或自此而盪于
彼或由彼而盪于此如一寒一暑之往來而无間則
卦卦可以成八卦雖六十四卦亦不外此而得之是
可知長男中男少男皆非自能成男也乾道成之也
長女中女少女亦非自能成女也坤道成之也何也
大哉乾元萬物資始是大始也乾能知之
此知字朱子作主字
解此乾道所以成男也至哉坤元萬物資生是成物
也坤能作之
此作字即造作之作此坤道所以成女也乾坤之

所係如此易之托始于乾坤不誠要哉

此節又由乾坤推廣八卦

六十四

卦言

乾以易知坤以簡能易則易知簡則易從易知則有親
易從則有功有親則可久有功則可大可久則賢人之
德可大則賢人之業易簡而天下之理得矣天下之理
得而成位乎其中矣

易以
致功

且人亦知乾坤之德性與功用為何如者哉夫乾固
知大始矣坤固作成物矣然使物物而知之則疑于

知之艱物物而成之則病于成之繁而乾坤不然也
乾蓋天下之至健健行則自无艱難險阻之虞以易
知也坤蓋天下之至順順承則自无煩擾作為之苦
以簡能也夫道莫貴于易易則光明正大而易知道
莫難于簡簡則含宏光大而易從易知則萬物一體
而有親易從則天工人代而有功有親則陰陽和合
而可久有功則生息繁滋而可大夫可久可大則其
德為日新之德是賢于人之德矣其業為富有之業

是賢于人之業矣而推其所由祇由于易簡蓋易簡則舉貴賤剛柔吉凶變化之理皆得矣其理既得則體乾之德者必能成位于上之中體坤之德者必能成位于下之中矣周易以乾坤冠卦首豈連山歸藏所能及哉

此節又收歸乾坤二卦

右第一章

聖人設卦觀象繫辭焉而明吉凶剛柔相推而生變化此承前章首節吉凶生變化見而申言之也

上三者其象已

著此二者其理未形故申言之

夫所謂吉凶生者生于卦中也而吉

凶未明也所謂變化見者見于六爻也而變化未生也文周聖人憫斯人之愚闇于是陳設六十四卦以觀其天地雷風水火山澤之象于卦象之下又各繫之以辭以明其若者為吉若者為凶而吉凶所在吉不知趨凶不知避可若何于是又取爻之剛者以推夫柔則柔變而化為剛又取爻之柔者以推夫剛則剛變而化為柔變化既生則吉者可以知所趨而不

至蹈于凶凶者可以知所避而亦將歸于吉矣

是故吉凶者失得之象也悔吝者憂虞之象也變化者進退之象也剛柔者晝夜之象也六爻之動三極之道也

繫辭以明吉凶嘗微之于人事矣人之行事順理為得即卦中得中得正得應之象也故吉也人之行事逆理為失即卦中失中失正失應之象也故凶也但吉凶者得失之已定而介于吉凶之間而未定者又

有悔吝焉所謂悔者因失而憂于心自凶而吉之象

也所謂吝者因得而虞

虞與娛同孟子歡虞如也即此虞

其志自吉

而凶之象也至剛柔相推而生變化則嘗証之天道
焉彼陰變化陽者即春進冬退之象也如復與臨是
也而陽上陰下者視此矣陽變化陰者即寒進暑退
之象也如姤與遯是也而陰上陽下者亦視此矣若
夫剛為晝柔為夜剛推夫柔為自晝而入于夜柔推
夫剛為自夜而復于晝此又其象之舉目可見者也

是四者名之為象體之則為道而皆由于動而後生
故六爻之中或動于天位或動于人位或動于地位
莫不有吉凶悔吝剛柔變化至極之道焉而豈徒吉
凶變化之虛文也哉

是故君子所居而安者易之序也所樂而玩者爻之辭
也是故君子居則觀其象而玩其辭動則觀其變而玩
其占是以自天祐之吉无不利

樂音洛

六爻備三極之道則學之要矣是故學易之君子于

易中之時位所謂自然之序者則奉為居身之宅而安之不遷也于易中之指陳所謂至蹟之辭者則珍為樂心之趣而玩之不厭也惟居安樂玩如是故當其靜而未卜筮時則統觀卦象而玩其辭及其動而既卜筮時則析觀爻變而玩其占夫如是則吉无不利凶无避動與道偕即動與天契自天祐之吉无不利即以希大有之上九何足異焉

右第二章

象者言乎象者也。爻者言乎變者也。吉凶者言乎其失得也。悔吝者言乎其小疵也。无咎者善補過也。

此又承前章首節之意而申言之言。文王于卦下繫之以辭名為彖辭。象者蓋言乎奇偶純雜卦各有象也。周公于爻下繫之以辭名為爻辭。爻者蓋言乎陰陽老少爻各有變也。夫象變之中非吉凶悔吝與无咎之辭乎。吉凶者蓋言乎時位之失則凶。時位之得則吉也。悔吝者蓋言乎時位有向于得而未得尚有

小疵而為悔向于失而未失已有小疵而為吝也无
咎者善其能補過也蓋有過則有咎補之則不過矣
故得无咎也此卦爻辭之凡例也

是故列貴賤者存乎位齊小大者存乎卦辨吉凶者存
乎辭憂悔吝者存乎介震无咎者存乎悔是故卦有小

大辭有險易辭也者各指其所之

易以
致切

象爻吉凶悔吝无咎其義既有然矣然爻言變而變
有貴賤當位者為貴失位者為賤是列貴賤者則存

乎其位也象言象而象有小大陰為主者為小陽為主者為大是齊小大者則存乎其卦也至卦爻之吉凶雖言得失而辨其何以得而吉何以失而凶則又存乎位之貴賤卦之小大之辭焉然則辭者尤卦爻之精蘊為人之所當玩索者也況吉凶之外其辭又有所謂悔吝无咎乎夫悔吝雖為小疵然由微而著大患亦從此而起安得不憂憂之何在則存乎善惡初分之介也无咎固由補過然因循苟且過亦終于

不能補安可不震震之何在則存乎覺悟深切之悔
也是故卦有陰陽小大之分辭遂有險怪平易之異
辭也者非有他也卦不過言其自貞而悔及錯綜上
下文不過言其由此至彼與陰陽變化各指所之
即傳所謂上下使人趨乎吉无咎免于凶悔吝而已
无常剛柔相易
學者可不勉哉

右第三章

易與天地準故能彌綸天地之道

第一章重贊乾坤以明易始乾坤之故二章三章總括卦爻以明文周繫辭之旨此下數章則總贊易書之大也此一章以天地比易書言易也者上律天時下襲水土與春夏秋冬而同運與東西南北而並周能相準也蓋乾之健行準天而凡得乾剛之爻者皆與天準坤之厚載準地而凡得坤柔之爻者皆與地準故廣大无量者天地之道也而易書有以彌之如開弓之愈開而愈滿

管窺曰彌綸是從裏面贊其充塞範圍是從外面贊其包絡

渾淪无端者天地之道也而易書有以綸之如治絲之有緯而有經是易書一天地也

仰以觀于天文俯以察于地理是故知幽明之故原始反終故知生死之說精氣為物游魂為變是故知鬼神之情狀

何以見易與天地準哉試即卦與爻觀之彼日月在天懸象著明者是天文也以易書仰觀之其在上卦者如坎為月離為日易文一天文也彼山川在地南

北高深者是地理也以易書俯察之其在下卦者如艮為山兌為澤易書一地理也故天體陽而常明而凡為陽卦陽爻皆不離乎明則觀易書之天文而明之故可知矣地體陰而常幽而凡為陰卦陰爻皆不離乎幽則察易書之地理而幽之故可知矣試為推原于其始而始實无始然自一畫初立雖无始而有始矣更為反要于其終而終實无終然自六畫既盡雖无終而有終矣夫始即生也終即死也故生之說

非他爻之立于初者是也原之則知之也

所謂初辭擬之是也

死之說非他爻之窮于上者是也反之則知之也

所謂

卒成之終是也

爻有少而不易者是著策之精氣所聚也聚

得陽者為陽物聚得陰者為陰物

傳曰乾陽物坤陰物

要之皆

神之伸也爻有老而當易者是著策之游魂所散也

京房易有游魂歸魂之卦

游于九六者為奇偶之變游于上下者

為應與之變要之皆鬼之屈也是故鬼神之情不可

測知易則知鬼神之情矣如害盈福謙者是已鬼神

之狀不可見知易則知鬼神之狀矣如張弧脫弧者是已夫幽明死生鬼神皆理之最難知者而易皆可
以知之易與天地準不益信哉

與天地相似故不違知周乎萬物而道濟天下故不過
旁行而不流樂天知命故不憂安土敦乎仁故能愛

周知

音智樂
音洛

易書準于天地豈特卦爻為然嘗微于義之圓圖矣
彼夫位于上下者天地也而易圖之乾坤亦分列于

上下是不但與天地準直與天地相似而无幾微之
違焉唯其不違故雖天地至大而不過運行而不流
鼓物无憂而又好生而能愛而以六子準之亦相似
不違也如易圖四正之卦列于東西者坎離也坎為
水其明在內者智也離為舟流于水上者濟也

坎上
離下

是水火既
濟故曰濟

自有坎離則于萬物之理其智无不周天

下之事其道无不濟是天地不過易亦不過也至四

隅之卦位于東北者震也震行一偏

震為足
故曰行

是旁行

也乃自出震而至成艮有節有序如水在盂

震有仰盂之象

而不至于流是天地不流易亦不流也由震而上位

于東南者兌也位于西南者巽也兌為悅悅即樂也

兌近乾乾即天也是易之有兌不如人之能樂其天

乎巽為風風即命也巽為權權即知也

巽以行權

是易之

有巽不如人之能知夫命乎孰謂天地无憂而易書

有憂乎震兌巽而外居于西北者艮也艮為土有安

居之象萬物之所成終而所成始者俱于艮之敦有

以仁之也故天地之好生能愛而易書亦能愛也此

非皆與天地相似者哉

此節向以仁智分貼不但辭義不確抑且語无層次沉章

皆明以易比天地泛言性理尤屬无謂今以八卦屬之似覺句句著實

範圍天地之化而不過曲成萬物而不遺通乎晝夜之道而知故神无方而易无體

由是推之寒往暑來暑往寒來者天地之化也而易書之陰陽闔闢直如模範圍繞之而不使過萬物資始萬物資生者天地之道也而易書之吉凶悔吝皆

能委曲成就之而不使遺自人觀之鮮不謂範圍曲成之大矣而自易書求之不過一晝陽夜陰循環不已之道而易書特有以通而知之耳故自其主宰而言有神焉或為陰或為陽兩在不測无可求之以其方自其運用而言則易也忽為陰忽為陽惟變所適无可執之以為體此其所以彌綸天地之道而與天地準也

右第四章

一陰一陽之謂道繼之者善也成之者性也仁者見之
謂之仁知者見之謂之知百姓日用而不知故君子之
道鮮矣顯諸仁藏諸用鼓萬物而不與聖人同憂盛德
大業至矣哉富有之謂大業日新之謂盛德

知者之知
皆音智

此承上章彌綸天地之道而言此節言天地之道下
節言易書彌綸天地之道也天地之間理而已矣无
所為道也因理不可形故假道路之道以形之言此
即人所共由之道也夫道亦多矣而切而求之總不

外前所言乾道變化之乾道坤道順承之坤道蓋乾陽也坤陰也一陰一陽有對待有流行有迭運之機有互根之妙是之謂道也是之謂天地之道也第道原于太極分于兩儀無間斷而何繼續無毀敗而何完成而就其往來推盪遞嬗不停中言之即可謂之繼蓋一元流行渾然純粹而善也自其各正保合資物无虧時言之亦可謂之成乃二五妙合粹然秉彛之性也人均有此善均有此性而氣稟所賦不能以

无偏有得陽之多質近于沉潜而仁者其所見偏于
仁則謂道盡于仁有得陰之多質近于高明而知者
其所見偏于知則謂道盡于知至于百姓則得陰陽
之雜者日用于仁知中而不知其所以然故知君子
仁知合一之道者鮮矣其唯天地乎天地造化之心
是仁也仁本在內而達之于雲行雨施品物流形之
際則顯矣天地造化之功是用也用本在外而斂之
于木落冰堅萬物歸命之時則藏矣夫顯即顯其所

藏而利貞于以元亨何仁之非知藏即藏其所顯而
元亨于以利貞何知之非仁天地以是鼓鑄鼓盪乎
萬物其藏也不竭其顯也不勞運大化于无心成大
功而不宰而不與聖人之教養斯民者同憂此其德
為如何之盛其業為如何之大哉而不其至哉則吾
且思之何以為大業夫業生于藏人苟无所藏則亦
无所有唯藏用之至乃得富其有故大業之謂謂其
富有也

物无不備
故曰富有

何以謂盛德夫德視乎顯人苟无

所顯則亦无所新唯顯仁之至乃得日以新故盛德之謂謂其日新也

變化不息故曰日新

此一陰一陽之道在天

地者然也

生生之謂易成象之謂乾效法之謂坤極數知來之謂占通變之謂事陰陽不測之謂神

此節言易之彌綸處句句與前相對生生句即一陰一陽之道成象句即繼之善效法句即成之性極數通變二句即大業顯諸仁陰陽不測句即盛德藏諸

用也 天地之道即一陰一陽之道而易則何如哉
夫易原于太極者也太極不能无動靜其動也即陽
之生也其靜也即陰之生也陰生之極陰又生陽陽
生之極陽又生陰其遞嬗不息交互不窮者道之生
生者然也聖人準此以為易其意亦猶是也夫易首
乾坤乾固六十四卦中生生之首也當其初畫奇二
畫奇止謂之陽不謂之乾者以未成乾卦之象也逮
三畫皆奇其象已成始謂之乾至于坤則配乾者也

當其初畫偶二畫偶祇謂之陰不謂之坤者尚未效

成象之法也逮三畫皆偶其法已效始謂之坤

坤乃兩乾

相並之象故為效法

若推極乎一生二二生四四生八八生六

十四卦以至于生生不窮之數而有以知來是之謂

占占則觀其變而旁通于六爻之情變動而不拘于

方通理而各得其利占以定信信以立事故謂之事

此一陰一陽之在易書者皆可得而知者也若夫體

乎一陰一陽之中无在无不在不可測而知者則謂

之神蓋一陰一陽之道在人為仁知在天地為德業
在易書為乾坤為占事人皆能測之唯言陽而陽之
中又有陰言陰而陰之中又有陽則非神不能以與
于此此即上下无常剛柔相易
不可為典要唯變所適此易所以為彌綸天
地之道也

右第五章

夫易廣矣大矣以言乎遠則不禦以言乎邇則靜而正
以言乎天地之間則備矣夫乾其靜也專其動也直是

以大生焉夫坤其靜也翕其動也闢是以廣生焉廣大配天地變通配四時陰陽之義配日月易簡之善配至

德

夫俱音扶

此又承上章生生之謂易一節而言而章末收歸于易簡以起下章也天下之物惟生生為不窮天下之理亦惟生生為無盡而易書之為義則主于生生然則夫易其生生之多至廣而无不包矣其生生之宏至大而无不統矣以上爻言之自初至終可謂遠矣

而百年千載皆可推測而知莫得而禦止之焉以初
爻之一畫方始可謂邇矣而一卦六爻皆已渾涵
于內蓋靜而能該至正焉上為天初為地中四爻則
天地之間也以天地之間言之凡人情之變態物理
之紛紜則无一不備于四爻之內易信乎其廣大
矣然易之所以廣大亦非有他也仍不外于乾坤兩
畫而已蓋乾為陽之動而其實根于陰之靜坤為陰
之靜而其實根于陽之動故夫乾當其靜也

此謂專
少陽

一而不紛及其動也

此謂老陽

直遂而不撓專以立直之

體直以達專之用是以卦中一切陰爻皆自乾而大

生焉夫坤當其靜也

此謂少陰

翕聚而不散及其動也

此謂

老陰開闢而莫遏翕以裕闢之本闢以擴翕之施是以

卦中一切陽爻皆于坤而廣生焉前所云生生謂易

謂以此耳夫无不覆者天乾能大生是乾直配乎天

也前所云成象謂乾者即配天之說也无不載者地

坤能廣生是坤直配乎地也前所云效法謂坤者即

配地之說也至若陽變而通于陰陰變而通乎陽陰陽之往來一如寒暑之代謝是易書之變通與天地之四時相配也前所云通變謂事者即此配四時之謂也七日來復有陽長之義八月有凶有陰長之義陰陽之消息即為日月之升沈是易書之陰陽與天地之日月相配也前所云知來謂占者即此配日月之謂也要之天地之四時日月祇一易簡之德為主宰易書之廣大變通與陰陽之義亦祇一易簡之

善為之綱維易書之善不又與天地之至德相配哉
知所配者在易簡之善則所謂陰陽不測之神者當
不可徒求之于渺冥恍惚之間矣

右第六章

子曰易其至矣乎夫易聖人所以崇德而廣業也知崇
禮卑崇效天卑法地天地設位而易行乎其中矣成性

存存道義之門

知音
智

此又承上章易簡之善而贊其至見唯聖人為能體

之也易簡之善配至德易誠極至矣夫易者乃聖人所以崇德而廣業也德得于天本高而當崇聖人窮易理于心而崇之以知蓋識見高明德不期崇而自崇也業著于事本切而當廣聖人體易理于身而卑之以禮蓋踐履平實業不期廣而自廣也然崇固以知而聖人之崇則效乎卦之天凡得于心而為德者務期于陽剛中正如乾之易焉卑固以禮而聖人之卑則法乎卦之地凡體于身而為業者務期于柔順

中正如坤之簡焉易簡得而天下之理皆得天下之理皆得而聖人所為崇德廣業者亦无乎不得矣何也易自伏羲畫一竒以象陽而為天畫一耦以象陰而為地天地之位設而四象八卦六十四卦交易變易移易之理行乎其中聖人本其效乎天而成為易之性法乎地而成為簡之性存之而又存舉凡天下所為統之為共由之道析之為一事之義者皆自成性之易簡而出是乾坤為易之門成性為道義之門

也然則易簡之善在易書者不已盡在聖人哉

右第七章

聖人有以見天下之賾而擬諸其形容象其物宜是故
謂之象聖人有以見天下之動而觀其會通以行其典
禮繫辭焉以斷其吉凶是故謂之爻

賾仕責切
斷丁亂切

此言聖人備易簡之善因為之設卦觀象繫辭焉而
明吉凶也謂天下之類聚羣分其巨細不可勝數者
固極其紛賾者也聖人有以見之于心而擬諸其陰

陽交錯之形容肖象其物情物理之合宜是故謂之
象天下之得失憂虞其利害不可勝窮者又極其變
動者也聖人有以見之于心而詳觀其衆理統會之
可通以行其動靜有常之典禮而繫辭以斷其合則
吉背則凶是故謂之爻

言天下之至賾而不可惡也言天下之至動而不可亂
也擬之而後言議之而後動擬議以成其變化

惡馬
路切

統乎象與爻之所言言天下之至賾紛雜莫稽似乎

可惡而就中思之至蹟而有至一者存則可悅而不
可惡也言天下之至動反復无端似乎可亂而就中
體之至動而有至常者存則可治而不可亂也夫象
與爻既不可惡不可亂學易者可漫然以言與動乎
如有言也必擬之于象而後言則所言皆適于物宜
如有動也必議之于爻而後動則所動皆合于典禮
言動悉準于易凡易中剛柔之變化皆學者言動之
變化矣是為擬議以成其變化也

下七爻皆擬
議言動之例

鳴鶴在陰其子和之我有好爵吾與爾靡之子曰君子
居其室出其言善則千里之外應之況其邇者乎居其
室出其言不善則千里之外違之況其邇者乎言出乎
身加乎民行發乎邇見乎遠言行君子之樞機樞機之
發榮辱之主也言行君子之所以動天地也可不慎乎

和胡卧切行下孟切
見音現樞尺朱切

此釋中孚九二爻義謂君子言出居室之間

言兌口
之象室

民門應在千里之外言以制其行行以踐其言

震為
足行

之象鳴和之感應有固然者故言行者君子之樞機樞

動而戶啟機動而矢發

艮為門震為木木在門中樞之象大離為矢震雷為發矢

發若雷機之象

一身之榮辱此其主也夫榮辱降之自天地

上二爻為天下二爻為地

而言行乃為之主故言行者君子之所

以動天地不可不慎也擬議此爻知言之貴乎矣

爻象已見

本爻之下

同人先號咷而後笑子曰君子之道或出或處或默或

語二人同心其利斷金同心之言其臭如蘭

號咷戶切

斷 丁亂切

臭 昌又切

此釋同人九五爻義君子大同之道其迹雖異其心

則同同心之行如至利之器可斷至堅之金

離為火
乾為金

火能克金有
斷金之象

物莫能間也同心之言如幽生之蘭自

有臭味之合

互與為茅有蘭之象蘭為臭
風吹八有其臭如蘭之象

物莫能離

也擬議此爻知言動之貴同心矣

出處語默之象
已見本爻之下

初六藉用白茅无咎子曰苟錯諸地而可矣藉之用茅

何咎之有慎之至也夫茅之為物薄而用可重也慎斯

術也以往其无所失矣

籍在夜切錯七故切
夫音扶重直勇切

此釋大過初六爻義凡事過則有失惟過于慎則无
失如物置于地復承藉以茅是慎之至也顧以茅之
薄物而重用之如此天下更何物可以輕乎而尚至
于有失乎擬議此爻知言動之貴慎矣

爻象見本
文之下

勞謙君子有終吉子曰勞而不伐有功而不德厚之至
也語以其功下人者也德言盛禮言恭謙也者致恭以

存其位者也

語魚具切
下遄緣切

此釋謙九三爻義人臣有勞不伐有功而不自以為德此豈器量淺薄者所能蓋厚之至而以其功下人也觀地中有山之象德之盛而充積如山焉禮之恭而接下如地焉德盛禮恭如此人復誰與之爭此所以長保其位而有終也擬議此爻知言動用謙之道矣

亢龍有悔子曰貴而无位高而无民賢人在下位而无輔是以動而有悔也

此釋乾上九爻義擬議此爻知言動之不宜亢也此節已見文言今復續于謙三之後正是一正一反欲人觀會通而行典禮之意貴而无位則位之不存可知高而无民則民之不服可知賢人在下无輔則其不能下人又可知矣何也以其亢而不能德言盛禮言恭也合而參之不更可得擬議之法哉

不出戶庭无咎子曰亂之所生也則言語以為階君不密則失臣臣不密則失身幾事不密則害成是以君子

慎密而不出也

此釋節初九爻義此以言立訓者以此章以擬議言動為主也下卦兌有口舌之象口舌不節猶人之門

戶不閉故君則失臣臣則失身幾事不密災禍立至

君謂五臣謂二幾事謂三

此尤君子之所宜重也擬議此爻知言

之不可不密矣

久象見本
久之下

子曰作易者其知盜乎易曰負且乘致寇至負也者小人之事也乘也者君子之器也小人而乘君子之器盜

思奪之矣上慢下暴盜思伐之矣慢藏誨盜治容誨淫
易曰負且乘致寇至盜之招也

乘也者
繩証切

此釋解六三爻義子以作易者為知盜以其言負乘
而致寇至也負乃在下小人之事乘為在上君子之
器苟處非其據適啟覬覦之心而盜思奪之矣且上
以名器假人是為上慢下竊名器以逞是為下暴上
下皆失不但奪其位且思伐其國矣所以然者如人
之慢藏其所有是誨人以來盜治容以自飾是誨人

以來淫皆自招也易之所言亦九二之自招而已矣

擬議此爻知居位者之不可妄動也

爻象已見本文之下坎險震動

以險而動有誡奪之象離兵坎馬持兵乘馬有伐之象離明坎隱隱而又明故象慢藏離女震動女而好動故象治容震為笑言象誨震為倒艮象手故招也此皆擬諸形容象其物宜之意

右第八章

周易辨畫卷三十四

欽定四庫全書

周易辨畫卷三十五

潁川連斗山撰

繫辭上傳下

天一地二天三地四天五地六天七地八天九地十

上章言擬議以成其變化謂筮著而得其所值之卦
爻也故此章遂言筮著之事言昔伏羲時龍馬負圖
出河其背上旋文有自一至十之數其位一六居下

二七居上三八居左四九居右五十居中以生數統
成數各居于一方是數也其即天地之數乎蓋天體
陽其數奇而圖之一三五七九皆奇是天也地體陰
其數偶而圖之二四六八十皆偶是即地也其數之
相符如此

此節古本在第十章之首張子程子以為
宜在大衍之朱子從之故移置于此

天數五地數五五位相得而各有合天數二十有五地
數三十凡天地之數五十有五此所以成變化而行鬼
神也

一三五七九屬天是天數五也二四六八十屬地是地數五也五數在圖各有定位就其奇先偶後次序不紊儼然如兄弟之相得焉而奇偶之中又各相契應儼然似夫婦之有合焉此特其分數耳積天之奇數計之共二十有五積地之偶數計之共得三十總之凡五十有五自有此數而相得有合者妙用無窮矣蓋相得則二氣迭運四時順布陰陽變化之理成乎其中有合則內外賓主互藏其宅而鬼神不測之

機行乎其內也

大衍之數五十其用四十有九分而為二以象兩掛一以象三揲之以四以象四時歸奇于扚以象閏五歲再

閏故再扚而後掛

衍延善切揲時設切扚郎得切

大衍之名何也即河圖中宮天五地十之數以五乘十而衍之一其十為十五其十為五十明其愈衍而愈大非若自一至五之小衍也其用止四十有九者以虛一則无極而生極所謂易有太極也既虛其一

次取所用之策平分左右以象兩儀也又次取右手
一策掛于左手小指之間以象三才也左右互揲以
四為節以象四時也又歸所掛之奇于左右之餘併
以象閏也揲四者為正數奇零者為閏數故掛為積
餘之端扞為積餘之總再扞之後而復起掛猶再閏
之後而復起積也

此及下節前賢言之
最悉故止釋大奇

乾之策二百一十有六坤之策百四十有四凡三百有
六十當期之日二篇之策萬有一千五百二十當萬物

之數也

當俱如字
期音基

乾九坤六以四營之乾則四九三十六坤則四六二
十四乾每一爻得三十六則六爻得二百一十六矣
坤每一爻得二十四則六爻得一百四十四矣合乾
坤兩卦之策凡三百有六十與期年三百六十日之
數適相當也

期年之數前人已悉言
三百六十舉正數也

若以上下經陰

陽之策三百八十四爻總論之陽爻百九十二每一
爻三十六得六千九百一十二策陰爻百九十二每

一爻二十四得四千六百八策合之萬有一千五百

二十當萬物之數也

獨言乾坤以易用九六不用七八故設言卦若得乾而六爻皆

九得坤而六爻皆六則其策數如此爾

是故四營而成易十有八變而成卦八卦而小成引而

伸之觸類而長之天下之能事畢矣

長知兩切

筮法成卦之序分二卦一揲四歸奇凡四度經營然

後或奇或偶始一變而成易由此積之三變成爻至

十有八變則內外備貞悔全于是成卦夫當初得卦

時三畫已具卦非不成然一卦止成一卦特小成耳
无濟于用也唯合六畫而大成則引而伸之自初至四
互為一卦自初至五又互為一卦自二至五互為一
卦自二至上又互為一卦如絲之愈抽而愈出人觸
類而長之錯之為一卦覆之為一卦旁通之又為一
卦而且一卦可變為八卦因類而觸又因觸而長由
六十四卦並可至于四千九百六卦凡吉凶趨避之
理纖悉俱備天下之能事盡于此矣

顯道神德行是故可與酬酢可與祐神矣子曰知變化之道者其知神之所為乎

行下孟切酬市
由切酢左洛切

夫所謂天下之能事者在易卦蘊之為道在人體之則為德行但人未以著問易時其道猶隱而未顯其行亦滯而未神及以著問易後吉凶之理判而趨避之情決道之隱者易有以顯之行滯者易有以神之是故易與人相隔而此問彼答可以與酬酢神與人同患而因著呈象併可以與祐神矣而要之神非

他不過一陰陽變化之道而已矣人苟能于圖數知其體于衍數知其用其即知神之所為乎故曰至誠如神

右第九章

易有聖人之道四焉以言者尚其辭以動者尚其變以制器者尚其象以卜筮者尚其占

此又總承上數章而言易能彌綸天地之道極之至于成變化而行鬼神幾于莫可涯涘矣而究乎其要

祇有聖人之道四焉仍不外前所云觀象玩辭觀變
玩占而已蓋聖人本乎道而繫之辭是言之則也故
欲以易而言者則尚卦爻之辭使淺深詳畧无不宜
焉聖人本道而裁之變是動之範也故欲以易而動
者則尚其卦爻之變使卷舒進退无不適焉擬諸形
容者聖人之象也故以易制器者則尚其象以盡創
物之智

制器亦不專在器用上凡事有一定之理
如器有一定之用皆由聖人之制作也

極

數知來者聖人之占也故以易卜筮者則尚其占以

窮先知之神

是以君子將有為也將有行也問焉而以言其受命也如嚮无有遠近幽深遂知來物非天下之至精其孰能

與于此

與音預下同

以言何為尚其辭以易之辭有至精者耳是以卜筮君子將有為于一身將有行于天下挾著問易而以言易則受人之問如對面相嚮

作響者非

告語親切無論

遠而天下後世近而瞬息几席幽而事幾之潛藏深

而情偽之叵測遂能舉將來之禍福一一周知而无遺非其辭之至精孰能與于此此以言者所以尚之也

參伍以變錯綜其數通其變遂成天地之文極其數遂定天下之象非天下之至變其孰能與于此

參七南切
錯七各切

綜宗
統切

以動何為尚其變以制器又何為尚其象以易之變與象有至變者耳蓋天下之至變者无如分揲掛扚

之事故當其四營成易之初由一卦而至一爻又由一爻而至一歸如人之相離而參也迨夫四揲三變之後或為奇偶之分居或為奇偶之合處又如人之相離而伍也是為參伍以變三變既成所餘之策或為伍與九或為四與八如物之錯然雜陳也九變既畢又將所錯之策或由前而觀夫後或由後而察夫前如物之綜而會合也是為錯綜其數然參伍以變特一爻耳天地之文未成也由一爻而再參焉再伍

焉是為通其變或為老陽少陽之卦或為老陰少陰

之卦而天地之文成矣

天即乾地即坤

錯綜其數特一卦耳

天下之象未定也由是而再錯焉再綜焉是為極其數或為純陰純陽之卦或為雜陰雜陽之卦而天下之象定矣非象與變為天下之至變其孰能與于此此以動以制器者所以尚之也

易无思也无為也寂然不動感而遂通天下之故非天下之至神其孰能與于此

至于尚占之道則非人所能為矣蓋天下之有心者
方有思慮方有作為易何所思何所為當人未以著
問易也易固寂然不動藏萬理于无形及人以分揲
掛扚相感而易遂能舉天下吉凶禍福之故无不通
其當然而併通其所以然非至精至變為天下之至
神孰能寂感不滯有如此此卜筮者所以尚之也
夫易聖人之所以極深而研幾也唯深也故能通天下
之志唯幾也故能成天下之務唯神也故不疾而速不

行而至子曰易有聖人之道四焉者此之謂也

扶夫音

夫精變神皆具于易何以能然也以作易之聖人為之也如事物未來隱于无形何深也聖人以至精者繫之辭使渺冥之理盡洩于見聞之地是易乃聖人之所以極深也陰陽甫動渾于未剖是幾也聖人以至變者形之象與變使微茫之理盡呈于耳目之間是易乃聖人之所以研幾也唯深也故吉凶明而迷者開天下之志能通焉唯幾也故趨避決而怠者奮

天下之務能成焉唯至精至變而神也故志之通若
或通之務之成若或成之有莫知其所以通且成者
其不求疾而自速不必行而自至者乎夫精變神皆
聖人之道而易之辭變象占筮有之故易謂有聖人
之道四者凡以此也

右第十章

子曰夫易何為者也夫易開物成務冒天下之道如斯
而已者也是故聖人以通天下之志以定天下之業以

斷天下之疑

夫俱音扶斷
丁亂切下同

此又承上章精變神而言聖人既如此而復作為易何為者也聖人為物之蒙昧未明者示以吉凶之理欲其知所趨避將以開之也務之艱鉅難舉者酌以易簡之理欲其有所適從將以成之也開之成之皆道之所在易之體具三極中該萬有將以冒天下之道而包舉无遺也易之所為必如斯而後已者也是故物未開則志未通聖人以易通其志使之不迷于

所向務未成則業未定聖人以易定其業使之不搖
于所往物未開務未成則疑難斷聖人以易通其志
以斷其心之疑定其業以斷其事之疑使之不滯于
變化此易之所以作也

是故著之德圓而神卦之德方以知六爻之義易以貢
聖人以此洗心退藏于密吉凶與民同患神以知來知
以藏往其孰能與于此哉古之聰明睿知神武而不殺

者夫

知來之知如字餘音智
與音預夫音扶下同

是故著之數七七四十九象天之圓當其先祇有著
未有卦陰陽之畫未定也其德則圓而神卦之數八
八六十四象地之方

二說本
崔氏憬

當其時既有著斯有卦

吉凶之象已成矣其德為方以智至操著畫卦之後
六爻森列一位自為一時一時自為一義逐爻交易
變易移易以貢獻于人易有此三者是以聖人當无
事之時若以三者之德洗濯其心而一念不存退藏
于密而一事不擾所謂无思无為寂然不動也及有

事之時則以物我一體之心吉凶與民同患其將至而未至者為來聖心之神足以知其來其現在而可知者為往聖心之智足以藏其往隨感輒應所謂感而遂通天下之故也其孰能若此哉其唯古之聰明足以通志睿智足以定業神武足以斷疑吉與民同趨凶與民同避而不事刑殺者方足以當之也

民知趨避

自然不罹于刑殺向作譬喻解者非是

是以明於天之道而察於民之故是興神物以前民用

聖人以此齋戒以神明其德夫

唯其聰明睿智神武不殺是以明于天有陰陽消長之道察于民有愛惡情偽之故于是興起著之神物以前民而用之為筮使其明于趨避之理而又恐民之褻瀆而弗敬也又齋戒而敬之以神明其德蓋神物之德本神明聖人齋戒而使民尊奉之是神明神物之德也

神物祇以著言不必兼龜

是故闔戶謂之坤闢戶謂之乾一闔一闢謂之變往來

不窮謂之通見乃謂之象形乃謂之器制而用之謂之

法利用出入民咸用之謂之神

闕胡臘切關婢亦切見賢偏切

夫坤物之德聖人何以神明之蓋著之策數總出于

乾坤是乾坤如易之戶也當著之未分如戶斯闔靜

无而含動有則謂之坤及著之既分如戶斯闢至微

而藏至著則謂之乾一闔一闢而著之變一成則謂

之變左右往來而著之數不窮則謂之道

左往而來右則左少

右多右往而來左則右少左多
多少之數无定故不窮

三變既成而老少之爻

見乃謂之象三畫既畢而奇偶之卦形乃謂之器

項氏

安世曰著策未定為象卦爻已形為

六爻俱備相其時位之當否制

為吉凶之辭而用之是謂之法

法如法律法度一定而不易者也

既

有法可遵于是出而作外事用之而利入而作內事

用之而亦利民皆因其利而用之鼓舞于其中而不

自知是謂之神此所以為神物此所以為神明也著

德之圓而神如此

是故易有太極是生兩儀兩儀生四象四象生八卦八

卦定吉凶吉凶生大業

由是卦之德爻之義所謂方以智易以貢者亦生于其間矣是故四營而成之易當其未營之先有虛一不用之太極焉太者大也極者至也言有至大之理以為之主宰也而于是分之為二以象兩則是太極生兩儀也儀匹也言陰陽相匹配也而于是揲之以四以象四時兩儀又生四象焉而于是一扐再扐再變三變而成八卦四象又生八卦焉八卦既成因而

重之而六爻亦備或為剛柔之本位或為九六之互
乘而吉凶即于此而定而大業亦于此而生所謂方
以智易以貢者不于著而並見哉

向以太極兩儀指
天地與易有太極

易字不合又以兩儀四象為畫卦是作卦非生卦矣
傳中凡言生皆筮卦非畫象也若謂是畫卦非筮卦
被太極即能生兩儀兩儀即能生四象四象即能生
八卦八卦即能定吉凶乎能生大業乎學易者不可不
深思之也

是故法象莫大乎天地變通莫大乎四時縣象著明莫
大乎日月崇高莫大乎富貴備物致用立成器以為天

下利莫大乎聖人探賾索隱鉤深致遠以定天下之吉

凶成天下之亶亶者莫大乎著龜

縣同懸探吐南切索色白切亶亡律切

卦爻皆本于著然則著之所關豈小哉是故法以象
器而制皆謂之法象而論法象之大者則莫大乎成
象效法之天地事以變動而通皆謂之變通而論變
通之大者則莫大乎分至啟閉之四時天文煥發皆
懸象著明而語其大則莫大乎陽精之日與陰精之
月爵位通顯皆謂之崇高而語其大則莫大乎富有

四海與貴為天子至于聚備諸物廣致民用立成器

以為天下利

物乃天之所生者器乃人之所成者

智者勑之巧者述之

不過一節而語其大則莫大乎制作之聖人凡此有

其小即莫不有其大也

以上皆引起之辭如詩之興也

而況物之賾

者探其一幾之隱者索其朕深而理數難窺者鈎之

使淺遠而時地難明者致之使近

事之煩者曰賾幾之幽者曰隱理之

難測者曰深地之難至者曰遠探者討而出之索者尋而繹之鈎者曲而取之致者推而極之

因以

定吉凶而得失之報明成疊疊而趨避之勇生

疊疊猶勉

勉人因吉凶之理昭然而勉勉于趨
避是天下之勉勉易有以成之也

他端小道雖亦

有之而極其大則莫大乎可以開物可以成務可以

斷疑之著與龜焉

此章專論著龜止
帶言詳見下註

是故天生神物聖人則之天地變化聖人效之天垂象

見吉凶聖人象之河出圖洛出書聖人則之易有四象

所以示也繫辭焉所以告也定之以吉凶所以斷也

見賢

遍切

著龜雖大而興之者惟聖人然聖人豈勉強而自作

哉著龜皆神物皆天之所生者本具有大衍之數

著草

蓍生百莖半之則應大衍之數五十龜背之文中五段旁四段周圍二十四段腹之文十二段總四十九段應大衍虛一不用而用四十有九之數聖人卜筮乃取其所本具者則

之而已至天地有四時之變化聖人易中之變化乃效法天地之變化也天垂象有日月盈昃之吉凶聖人易中之吉凶乃取象天象之吉凶也若夫龍馬負圖出于河而數之體顯靈龜載書出于洛而數之用彰聖人易中之體用其對待者乃則乎圖之體其流

行者乃則乎書之用也非勉強而自作也

圖占相為未求圖以

五生數統五成數其位主于合而其序主于生書以
五奇數統四偶數其位主于離而其序主于艮圖著
其方以象而存數之體對待之易也書著其圓以數
而呈象之用流行之易也圖書皆上古時所有考帝
王世紀河出龍圖洛出龜書鄭氏易註亦云相傳龍
馬出河負圖九冊神龜出洛負書六冊而孔安國劉
歆諸儒以洛書為禹治河時所出則夫子引以為義
皇作易所則反大錯矣考禹治河所得名為洪範不
名洛書觀書云天乃錫禹洪範
九疇而不及洛書是可証也 夫神物變化吉凶圖

書皆象也聖人作易既則而效之又象而則之是四

者皆為易之所有矣易之有此何也所以示人以可

據而通其志也于象之中又繫之以一卦之象辭六爻之爻辭何也所以告人以可信而定其業也于辭之中又定之孰為吉而當趨孰為凶而當避何也所以教人以果決而斷其疑也則信乎易為開物成務冒天下之道者也

右第十一章

易曰自天祐之吉无不利子曰祐者助也天之所助者順也人之所助者信也履信思乎順又以尚賢也是以自天祐之吉无不利也

夫聖人之所示所告所斷如此者豈徒然哉彼大有上九不云乎自天祐之吉无不利蓋天之所助在巽順人之所助在誠信六五于大有之終所踐履者皆誠信所思慮者皆巽順而又以此信順尊尚乎賢人則上合天心是以自天祐之而吉无不利人苟能于易之所示所告所斷亦如上九之誠信巽順而尊

尚之則天人交應豈不如上九所云哉

此節本義以為錯簡

宜在第八章之末侯氏果以為引此以作証按第二章及後神農節俱引此二句與此處大義相同

侯氏說

是也

子曰書不盡言言不盡意然則聖人之意其不可見乎
子曰聖人立象以盡意設卦以盡情偽繫辭焉以盡其
言變而通之以盡利鼓之舞之以盡神

此章總承上文而通論之而歸重于人之德行也兩
子曰者設問而自答之也書以紀言而言非書之所
可盡言以達意而意非言之所可盡然則聖人與民
同患之意于何見之蓋聖人仰觀俯察見天地間不

外一陰一陽于是本陰陽以畫奇偶因奇偶而畫八卦立為天地雷風水火山澤之象精粗鉅細无所不包而聖人之意盡矣

諸家皆以奇偶兩畫為立象而不以八卦者以下有設卦句也

不知設卦乃八卦各加八卦指六十四卦而言不相妨也

然八卦之象雖立而人

世之情偽猶未盡情偽未盡即聖人所欲言者未盡也于是陳設八卦重之為六十四卦二卦有一名一名有一義剛柔錯居淑慝雜呈而情偽盡焉情偽既盡于是隨其卦之大小爻之剛柔而繫之以辭卦有

情偽文亦有情偽

即貞與不貞之謂

情繫以吉辭偽繫以凶

辭而其言亦盡矣

言不盡意言字乃著書明道之言此言字乃盡情偽之言也不然既

曰書不盡言而又曰繫辭以盡言可乎

夫盡言盡意皆所以利天下神

天下而要非膠于象而泥于辭也又于觀象玩辭中

教人以卜筮再觀其變而更玩其占變者卦爻中之

九與六也或陰變為陽或陽變為陰而剛柔不局于

一體因即其變中或此通于彼或彼通于此而上下

不滯于一方其法愈密其用愈廣而足以盡利矣占

者卦爻中之吉與凶也事之得者報以吉事之失者報以凶既有以鼓之而不疑因即其占中吉者則趨事而赴功凶者則避禍而遠害自有以舞之而不倦

若或輔之若或翼之而神亦盡矣

吳氏澄曰鼓者鼓聲舞者舞容鼓聲

愈疾舞容亦愈疾所謂盡神也

項氏安世曰立象設卦繫辭作易之

事變通鼓舞用易之事也

乾坤其易之緼邪乾坤成列而易立乎其中矣乾坤毀

則无以見易易不可見則乾坤或幾乎息矣

緼紆粉切

夫立象設卦繫辭雖有三究之不外乾坤之兩畫而已蓋易之有乾坤猶衣著之有絮乾坤乃易之緼也

緼衣中之絮易之緼謂乾坤緼于易六十四卦之中非謂易緼于乾坤兩畫之中也易中凡陽

爻皆為乾凡陰爻皆為坤乾坤散布于八卦而象立乾坤散布于六十四卦而卦設是為成列成列則時地有當否位象有得失而交易變易移易之理乃立乎其中而辭可繫假使乾坤不成列而毀則八卦不備重卦不全時地之當否位象之得失交易變易移

易之理皆不可見則辭亦无從而繫而乾坤之用或幾乎息尚能變通以盡利鼓舞以盡神耶

是故形而上者謂之道形而下者謂之器化而裁之謂之變推而行之謂之通舉而措之天下之民謂之事業

上時
掌切

顧立象設卦繫辭皆有形者也變通鼓舞則无形者也有形者何以能使无形者盡利且盡神哉蓋天下无形者即有形者之體有形者乃无形者之用其體

與用原不相離也是故同一形也其超乎形而上者理也則謂之道其囿于形而下者質也則謂之器其

實一形而已

此二句祇為下三句作引見得道器一貫立象設卦繫辭所以能盡利盡神且

不必太說玄遠

如象與卦與辭是器也而其中有至精至粹

者存則道也惟有道以寓乎其中所以象卦之中有

剛柔之當化者即因其化而裁制之則謂之變

久位得當

者則不必化又位不當者則當化如既化矣

位已當矣則不得更化所以曰化而裁之卦中之

又有時位之當行者即相其行而推遷之則謂之通

如上下无常剛柔相易是也
向俱說到人事上與下句碍

既變既通則其占皆利

因舉其利者而措于天下之事則事无不立業无不
成斯謂之事業而神有不盡者乎

是故夫象聖人有以見天下之赜而擬諸其形容象其
物宜是故謂之象聖人有以見天下之動而觀其會通

以行其典禮繫辭焉以斷其吉凶是故謂之爻

扶夫音

變通盡利鼓舞盡神所謂既如此矣而立象與設卦
繫辭豈无謂哉是故夫象者聖人有以見天下事物

繁蹟而擬諸卦象之形容象其卦象之物宜是故謂之象聖人有以見天下人情之動作而觀其聚會之通處以行其不易之典禮因繫辭以斷其吉凶使知所趨避是故謂之爻

不曰辭而曰爻者辭脩于爻也

極天下之蹟者存乎卦鼓天下之動者存乎辭化而裁之存乎變推而行之存乎通神而明之存乎其人默而成之不言而信存乎德行

德行下孟切

易之所謂如此吾于是而得學易之道矣聖人見天

下之蹟而立之象學者欲究極天下之蹟則存乎卦之象聖人見天下之動而繫之辭學者欲鼓舞天下之動則存乎爻之辭易有化裁之變學者于過有所當改欲化而裁之則存乎卦爻之變易有推行之道學者于善有所當遷欲推而行之則存乎卦爻之通若夫超乎象辭變通之外以吾心之神默契乎聖心之神而明乎象辭變通之所以然則存乎學易之人何也書不可以盡言言不可以盡意不事于書與言

而默成其事深信其理自非與聖為一者未能神明
若此此則存乎以乾健坤順之德體易知簡能之行
而非他人之所能與矣

右第十二章



周易辨畫卷三十五

欽定四庫全書

經部

周易辨畫卷三

詳校官給事中臣丁雲錦

通政使司副使臣莫瞻菴覆勘

總校官庶吉士臣倉聖脉

校對官中書臣牛稔天

謄錄監生臣王宜

欽定四庫全書

周易辨畫卷三十六

潁川連斗山撰

繫辭下傳上

八卦成列象在其中矣因而重之爻在其中矣剛柔相
推變在其中矣繫辭焉而命之動在其中矣

重直
龍切

此又承前篇之卒章言著卦之象辭變占也前言擬
形容象物宜謂之象是象自文王始有也不知伏羲

始畫八卦當其成列時而文王之卦象已在其中矣

八卦以橫圖言成列者成乾一兌二離三震四巽五坎六艮七坤八之行列也象者六十四卦之名象也

前言觀會通行典禮謂之爻是爻自周公始備也不

知伏羲設卦觀象因而加重時而周公之爻義已在

其中矣前言化而裁之謂之變是變自卜筮始見也

不知六十四卦剛柔相推內

此剛柔相推以八卦相

剛始卦一陰生則柔之推夫剛也坤卦六爻皆柔復卦一陽生則剛之推夫柔也他卦放此而卜

筮之變已在其中矣前言舉而措之天下之民謂之

事業事業即動也是由占而出者也不知文周繫辭
命以吉凶時而占決之動已在其中矣

吉凶悔吝者生乎動者也剛柔者立本者也變通者趣

時者也

趣七
樹切

繫辭以命動何以在其中蓋辭之所命者吉凶悔吝
也占者因其所命之吉而趨之因其所命之凶悔吝
而避之是動由吉凶悔吝之辭而生故曰動在其中
也

向謂吉凶悔吝因人之動而生是卦
在人動之後矣與在其中亦不合

剛柔相推變

何以在其中蓋卦爻之變不出剛柔兩畫是剛柔者所以立變通之本變通者因剛柔之不當而變之通之以趨時

時即道也

乃剛柔之用故曰剛柔相推變在其中也

吉凶者貞勝者也天地之道貞觀者也日月之道貞明者也天下之動貞夫一者也

觀宮換切夫音扶下同

吉凶悔吝雖有四其實悔乃由凶而至吉吝乃由吉而至凶約之祇有吉凶二者而吉凶二者約之又不可

過一貞蓋六十四卦三百八十四爻貞者皆吉不貞者皆凶是貞勝者也唯其貞勝故天地之道无私覆載其觀示于人者祇一貞也日月之道无私照臨其明燭于下者亦一貞也

二句乃引起下文之意不必又生枝節

況天下

之動其變通以趨時者有不貞夫一乎蓋時之所在即貞貞之所在即時一而已矣

夫乾確然示人易矣夫坤隤然示人簡矣爻也者效此者也象也者像此者也

確空各切易以鼓切隤大回切

豈特動變貞夫一彼易之為書不外乾坤兩畫則乾之所以為乾宜乎難坤之所以為坤宜乎繁矣乃觀于乾坤至剛至健其確然示人者易也至柔至順其隤然示人者簡也

確然健貌
隤然順貌

此乾坤之貞一也彼爻

在其中的爻也者不過效此易簡而已矣象在其中

之象也者亦不過象此易簡而已矣豈有他哉

爻象動乎內吉凶見乎外功業見乎變聖人之情見乎

辭

見賢
遍切

爻象變動皆本于貞一故爻象雖未動而有貞與不貞則動之理已具其貞者示以吉不貞者示以凶爻象動乎卦畫之內而吉凶即見乎卦畫之外也

爻象在卦

畫本有故曰在內吉凶乃因卦畫而係故曰在外

有吉凶斯有趨避有趨避

斯有功業而功業則見乎爻象之變變也者所以變不貞以歸于貞也而要之皆由于聖人與民同患之情蓋聖人之情不可見而見之辭六十四卦一卦有一卦之辭三百八十四爻一爻有一爻之辭无非教

人以貞而已學者即貞以求之而易之所以為易无

餘蘊矣

首節由象而又而變與動順說下來以下則由動而變而又與象逆申上去此節則總結之

右第一章

天地之大德曰生一節原在此章之末但前節明係結上大德節與此絕不相

屬先儒移作下章之首今從之

天地之大德曰生聖人之大寶曰位何以守位曰仁何

以聚人曰財理財正辭禁民為非曰義

禁金鵠切

此又承上章象爻變動而申言之而此一節則其總

冒也蓋下文十三卦其為象與爻不待言其所云前此未有而今興及前此已有而今易之者即變也其所云教民以利而使民趨示人以患而使民避者即動也而總不過曰理財正辭禁民為非而已如易結繩以書契是正辭重門擊柝弦弧剡矢是禁為非餘十卦皆所以理財蓋財者乃生民之軀命而聖人仁天下之要道也故將言聖人仁天下之道而先遡其原于天地之心曰生生不已者天地之大德也然天

地生人物必又生一與之合德者命之居君師之位
然後能使所生者得以各遂其生也故位為聖人之
大寶也然有其位非仁以為心而位何以守有位斯
有人非財以贍之而人何以聚故水火金木土穀凡
所以養民之財者无不理也既養之又教之凡所為
化民之辭者无不正凡所為格民之非者无不禁也
皆當然之義也

古者包犧氏之王天下也仰則觀象于天俯則觀法于

地觀鳥獸之文與地之宜近取諸身遠取諸物于是始

作八卦以通神明之德以類萬物之情

包白交切犧許宜切王于泥切

古者包犧氏之王天下也有大寶之位者也仰觀于

天有雷風日月之象俯觀于地有水火山澤之法

以象

氣言法以形言

而并觀動物鳥獸之文

如離象難坎象不之類

植物與

地之宜

如崔華象震果藏象艮之類此與字不連土句言物之與地相宜者

近取諸一

身

如乾象首坤象腹是也

遠取諸萬物

如乾為金玉坤為布釜是也

見天地

間之對待者流行者皆不出乎陰陽之外于是畫一

奇又畫一偶一奇一偶又交互而畫成八卦所以通達其神明之德而立體類似其萬物之情而取象也

此即前章八卦成列象在其中下十三卦皆因而重之又在其中也此可見六十四卦皆據象所畫

作結繩而為網罟以佃以漁蓋取諸離

罟音古佃音田

上古之世人物雜處而人常為物所害包犧氏始教人取絲麻而結之為繩又作結繩為網以取禽獸曰佃作結繩為罟以取魚鼈曰漁所以使民知鮮食之利而并去其害也其象蓋取諸離離者兩目相承而

物自麗者也

離卦二四互巽為繩三五互兌為倒巽亦為繩兩繩相牽故曰結離卦為目二

目相連于結繩之中故為網罟聖人非必觀此卦而成之而其象則適相合爾餘放此

包犧氏沒神農氏作斲木為耜揉木為耒耒耨之利以

教天下蓋取諸益

斲陟角切
耨奴豆切

上古茹毛飲血教民火食自包犧氏始教民粒食自

神農氏始神農念民食在樹藝而樹藝在農器于是

斲木使銳謂之耜以為耒之首揉木使曲謂之耒以

為耜之柄耒以入耜耜以起土以此耒耨之利教天

下其象蓋取諸益益者兩木相合上入而下動者也

其震皆木互艮為手下震為足上巽為進退互坤為土田以手握木以足進退于田土之上耕之象也故

益卦初爻

本此為辭

日中為市致天下之民聚天下之貨交易而退各得其
所蓋取諸噬嗑

民生所最重者食與貨也故神農既教民以食即教
民以貨于是日中為市致其民聚其貨各以所有易
其所无交相換易而退民始各得其所其象蓋取諸

噬嗑噬嗑食也市井交易飲食之道故取諸此也

離在

上日中之象震為大塗互艮為居市之象卦中三陰民之象坎水艮山貨物所出聚貨之象四來居三五往居上交易而退之象六

交皆正各得其所之象

神農氏沒黃帝堯舜氏作通其變使民不倦神而化之使民宜之易窮則變變則通通則久是以自天祐之吉

无不利黃帝堯舜垂衣裳而天下治蓋取諸乾坤

治直
夾切

犧農之時民俗樸畧食貨之利雖興衣裳之制未備衣裳之制未備即尊卑貴賤之分未明是亦民心欲

變之機也數聖人于是因其變而通之使天下之心
皆歡忻鼓舞趨之而不倦所以然者以聖人之通變
非有以強之唯其以不測之神布无言之化使民見
之為當然習之如固然與為相宜而已故易之所謂
變者亦非故為變也以時窮則變變則始通通則始
久彼大有之五正所謂窮變通久者是以因變而動
得天之祐而吉无不利也

十三卦皆有象又變動但象又顯而易見變動隱而

難明故于此節引大有之五以明之前註大有之五謂其義取旁通得此可以互証此文謂五諸家皆悞

謂上也

黃帝堯舜易卉服而為上衣下裳之制以垂于

後世使天下皆曉然于尊卑貴賤之等而胥歸于治

亦變通宜民之一端也其象蓋取諸乾坤乾坤者上

下有衣裳之體闔闢有變通之義也

衣制圓象乾裳制方象坤又衣

有六幅象乾之六奇裳

有十二幅象坤之六偶

剡木為舟剡木為楫舟楫之利以濟不通句致遠以利

天下句蓋取諸渙

剡口姑切剡以冉切下同

文治既立川澤或阻則聲教未廣也乃剡木使中虛

為舟剡木使末銳為楫舟以載物楫以運舟舟楫之利近濟渡其不通遠可致之以利于天下其象蓋取諸渙渙者吳木乘坎水利涉大川也

中互大離象舟吳為長木象楫

互艮為手

象剡與剡

服牛乘馬引重致遠以利天下蓋取諸隨

舟楫雖利陸行或阻聲教仍未廣也于是因牛之性順穿其鼻以服之因馬之性健絡其首以乘之使牛引其重馬致乎遠以利益天下其象蓋取諸隨隨者

下震為行互艮為止上兌為悅行止隨人而喜悅也

震自坤變坤為牛互巽為繩互艮為鼻以繩入鼻服之象也兌自乾變乾為馬互艮為背互巽為股股在背上束之象也坤後一奇象牛之引重兌前兩開象馬之致遠

重門擊柝以待暴客蓋取諸豫

重直龍切柝天作切

川途既通暴客或至不可不備也于是設重門以防

其外又擊柝以警其內防閑既密縱有暴客有以待

之矣其象蓋取諸豫豫者怠也又備也恐人之怠而

早為之備也

震倒艮為門下互艮又為門重門之象震為木為聲艮為手手持有聲之木擊

析之象互坎為

盜暴客之象

斷木為杵掘地為臼臼杵之利萬民以濟蓋取諸小過

斷丁緩切杵呂切

掘其月切臼求酉切

既有耒耜以開粒食使食之不精所以利民者猶未
至也于是又斷木為杵使之舂掘地為臼使之容杵
臼興而粒食皆為精食萬民以濟矣其象蓋取諸小
過小過上動而下止與杵臼无異也

上震為木互兌
為金斷木為杵

之象坤為地艮為
手掘地為臼之象

弦木為弧剡木為矢弧矢之利以威天下蓋取諸睽

重門雖設僅能自守使無以制人何以威天下而使
之畏于是弦木使曲以為弧剡木使直以為矢弧矢
之利可以威天下之不軌其象蓋取諸睽睽者火澤
乖異弧矢所以服之也

坎為弧次中剛而兩端柔故
離為矢離中虛而前後實

故也此與重門擊柝
皆禁民為非之義

上古穴居而野處後世聖人易之以宮室上棟下宇以
待風雨蓋取諸大壯

衣食既足宮室未興風雨之患猶未免也蓋上古之民冬无以居穴土以為居夏无以處曠野以為處後世聖人易之以周垣之宮戶牖之室上隆其棟下垂其宇以待風雨其象蓋取諸大壯大壯者震木起于

上乾天覆其下也

震仰象穴坤土象野倒艮象居與處乾圓象宮反艮象室棟屋棟震

木在上之象宇屋簷乾覆在下之象兌為澤倒巽為風俱在天上待下之象

古之葬者厚衣之以薪葬之中野不封不樹喪期無數

後世聖人易之以棺槨蓋取諸大過

未于既切數色具切

生既安其居而死弗厚其葬无以教民孝也古之葬者人死則厚衣之以薪葬之中野之地不封土以為墳不樹木以為識且居喪之期无卒哭祔練祥禫之日數後世聖人易之以內棺外槨不使土親其膚其象蓋取諸大過大過者中四皆人上下皆土人入土中大事已過也

乾為宋巽為薪上下坤上為野人在其中為葬之中野无艮山故不封无

震木故不樹无坎月離日故喪期无數上兌為口下巽為木互乾為父父在有口木中故象棺槨

上古結繩而治後世聖人易之以書契百官以治萬民

以察蓋取諸夬

上治直吏切
下治昌時切

理財禁非之事已備而辭乃治天下萬世之大者尤不可以不正也蓋上古民風淳樸惟結繩以為符驗

而人心自各相信天下即治後世漸趨于偽聖人于

是易結繩以書契

吳氏澄曰書以刀筆刻木簡為大字契以木刻之畫而中分之各執

其一合之以為信也

百官之功罪可稽而治萬民之情偽可覈

而察其象蓋取諸夬夬者以陽剛決陰柔猶以文字

去欺詐也

兌反巽為繩乾通坤為文書契之象也十
三卦以畫卦始以書契終蓋萬世文字之

也祖

右第二章

是故易者象也象也者像也象者材也爻也者效天下之動者也故吉凶生而悔吝著也

上章中言象爻變動之事詳于象而畧于爻詳于變而畧于動故此章承前章之象變而申言爻動觀章首以是故二字開端明係從上章說來

于氏實曰言是故人總結

上義也吳氏澄曰前總敘起此以是故總結之

上文十三卦皆制器尚象之

事然豈獨十三卦為然是故易者聖人立象盡意之書也皆象也象也者非憑虛而无據實以器物之形真有像乎易之體聖人因其像而象之也象在一卦名為象象者言其材也器必聚其材而後器可制卦必括其材而後卦始全也象在一畫名為爻爻者言其效也有剛柔之得位者則效其動而示以趨有剛柔之失位者則效其動而示以避也惟象爻所係如此是故得失之報明而吉凶生憂虞之機辨而悔吝

者也又與動豈出于象變之外哉

右第三章

陽卦多陰陰卦多陽其故何也陽卦奇陰卦偶其德行何也陽一君而二民君子之道也陰二君而一民小人之道也

奇紀宜切
行下孟切

此與下宜合為一章承上象與爻而言而此節則申言象材之義也乾坤二卦其為陰陽不待言矣震坎艮為陽卦宜乎陽畫多于陰畫而此三卦皆一陽二

陰陰畫反多巽離兌為陰卦宜乎陰畫多于陽畫而此三卦皆一陰二陽陽畫反多何故蓋陽卦皆索于乾而得陽卦以奇為主也陰卦皆索于坤而得陰卦以偶為主也其體如是其德行何也陽為君陰為民天地之常經古今之通義也陽卦一君而二民統一則治君子之道也陰卦二君而一民權分則亂小人之道也此就三畫卦以明一卦之材若因而重之則凡有一卦必有一卦之主亦必有一卦之義其材亦

猶是也

右第四章

易曰憧憧往來朋從爾思子曰天下何思何慮天下同歸而殊塗一致而百慮天下何思何慮

上章申言象者材也之義此章申言爻者效天下之動之義天下之動貞夫一故先引咸四一爻以見天下之理本一而人當貞之也其下十爻兩兩相對皆不出此一爻之意易曰憧憧往來朋從爾思子曰天

下之動貞夫一何必憧憧往來至於思又至于慮哉
蓋天下理本同歸也但其事不同而其途因之各殊
耳天下理本一致也但其事不一而其慮因之有百
耳夫慮百而致仍一必其一之貞也塗殊而歸仍同
必其同之貞也然則吾人之感應總貞夫一而已何
必憧憧而思而慮哉

六十四卦皆歸既濟故曰同歸
曰一致一卦各為一爻一爻各

為一義故曰
殊途曰百慮

日往則月來月往則日來日月相推而明生焉寒往則

暑來暑往則寒來寒暑相推而歲成焉往者屈也來者

信也屈信相感而利生焉

信音伸下同

即以咸卦言之下卦本離離為日初往居四是日往也上卦本坎坎為月四來居初是月來也初再推四四再推初依然坎上離下而明生矣貞矣上卦本坎坎居北為寒四陰變陽是寒往也下卦本離離居南為暑初陽變陰是暑來也初推夫四四推夫初依然坎離一週而歲成矣貞矣夫初之往而居四者是陰

之屈也四之來而居初者是陽之信也祇此一屈一
信之往來相感而明與歲之利皆生焉況人事之往
來而可懂懂乎

尺蠖之屈以求信也龍蛇之蟄以存身也精義入神以
致用也利用安身以崇德也過此以往未之或知也窮
神知化德之盛也

蠖鳥郭切
蟄直立切

夫日月寒暑相為對待猶疑為二也試以一物言之
彼在四之一陰猶尺蠖耳

蠖名步屈行
則首尾相就

其降于初而

屈也即所以返于四而求信也在初之一陽乃龍蛇

也其升于四蟄也

上為澤龍蛇入澤下故曰蟄

即所以返于初而

存身也夫四下為少男初上為少女其中有義焉若
精研其義而入于神則其所以為上為下者即其所
致感應之用也至六歸于四仍為坎九復于初仍為
離其中有用焉若利其施用而安其身則其所以得
位而得應者即其所以崇剛柔之德也皆貞夫一者
也若過此貞一以往未可以聞見知矣由貞一而馴

至于窮神更由貞一而漸臻于知化惟德之盛者乃

可以及此然亦不外此貞一也憧憧何為哉

此向來謂此十一

又皆擬議以成其變化之事錯簡于此吳氏纂言自將十一又修置大言傳中蓋未知此為中言久者效

天下之

動耳

易曰困于石據于蒺藜入于其宮不見其妻凶子曰非
所困而困焉名必辱非所據而據焉身必危既辱且危
死期將至妻其可得見邪

此即困三之不貞以見其動之宜貞也六三以柔居

剛履非其位上困于四之石是非其所當困而困也
不當困而困必至于辱其名下據于二之蒺藜是非
其所當據而據也不當據而據必至于危其身既辱
且危身尚不保而況欲全其室家之好乎總由于居
位不貞以至此此動之所以當貞也

象見本爻下翼
易曰君子積義

利用安身日入乎神小人
見利名辱身危日迫于死

易曰公用射隼于高墉之上獲之无不利于曰隼者禽
也弓矢者器也射之者人也君子藏器于身待時而動

何不利之有動而不括是以出而有獲語成器而動者

也

射食亦切括舌
活切語于具切

此即解三之不貞以見上之動而能貞也隼者禽也

謂六三也

三居互離中
為雄故象禽

弓矢者射隼之具也謂坎離

也

坎為弓
離為矢

射之者人也謂上六也夫上六何以射之

即獲而无不利哉蓋上六得正之君子也當解之時

與三為正應宜乎一往无前惟其所解矣以時尚未

至故寧藏其弓矢之器于身以待二五易位而後動

是以出所藏以為用動焉而无滯括之碍隨所用而
皆利出焉而有應手之獲爻之所云正言上成其器
而後動是以一動而六三能貞也

子曰小人不恥不仁不畏不義不見利不勸不威不懲
小懲而大誡此小人之福也易曰屢校滅趾无咎此之
謂也

此及下節即噬嗑初九上九爻辭以警人之動而不
貞也人生之動莫要于仁義仁義即貞也失其仁義則宜

加之以懲誠蓋懲誠者所以適于仁義之路也彼小人不以不仁為可恥不義為可畏不見利于己不知

勸勉于仁義

如卦之所言凶者是也

不見威于人不肯懲勸于

不仁不義

如卦中所言凶者是也

惟其然故懲其小者于前正

以誠其大者于後此小人之福也易曰屢校滅趾无

咎此止惡于初正小懲大誡之謂也

如爻之當貞而即貞者是也

善不積不足以成名惡不積不足以滅身小人以小善為无益而弗為也以小惡為无傷而弗去也故惡積而

不可掩罪大而不可解易曰何校滅耳凶

去羌呂切
何河可切

此承上節而言苟不懲誠于其初而小且積之而成

大如善為成名之基不積則名不足成

如又之當
位者是也

猶

惡為滅身之原不積則身未足以滅

如又之不當
位者是也

乃

小人以小善為无益于名而弗為以小惡為无傷于

身而弗去故惡積至于不可掩罪大至于不可解矣

易曰何校滅耳凶此由小不懲而大不誠遂至此極

也

如又之當貞而
不貞者是也

此二爻見先王之明罰勅法皆所

以貞人之動也

上節是戒其震足之妄行此節是懲其坎耳之不聽

子曰危者安其位者也亡者保其存者也亂者有其治者也是故君子安而不忘危存而不忘亡治而不忘亂是以身安而國家可保也易曰其亡其亡繫于苞桑

治俱

直吏切

上二節言在下之小人此二節言在上之君子此節言人君之動不可以不貞下節言人臣之動不可以不貞也從古安危存亡治亂總操于人主之一心心

之若危者乃以安其位心之若亡者乃以保其存心
之若亂者乃以有其治蓋安存治者貞也危亡亂者
不貞也君子有見于此故四方无虞可謂安矣而不
敢忘危焉宗社鞏固可謂存矣而不敢忘亡焉紀綱
整肅可謂治矣而不敢忘亂焉惟不忘若是足以身
安其位而國家可保其存與治也易之否五曰其亡
其亡繫于苞桑蓋言人君之心雖貞而猶恐其不貞

也

象見本
久下

子曰德薄而位尊知小而謀大力小而任重鮮不及矣

易曰鼎折足覆公餗其形渥凶言不勝其任也

知音智勝音計

人臣稱位以德謀事以知任事以力德不稱位知不

逮謀力不副任

此不貞也

則位必傾謀必敗任必仆鮮不

及于禍矣易之鼎四曰折足覆餗而形渥者言其以剛居柔不勝大臣之任也觀此則人臣之動何可以

不貞哉

象見本爻下

子曰知幾其神乎君子上交不諂下交不瀆其知幾乎

幾者動之微吉之先見者也君子見幾而作不俟終日
易曰介于石不終日貞吉介如石焉寧用終日斷可識

矣君子知微知彰知柔知剛萬夫之望

先見之見音
現斷丁亂切

咸四一爻為下十爻之綱祇精義入神以致用利用
安身以崇德二語足以該之以上所引或相反或相
類其用之利不利與身之安不安而義之精與不精
自見此文與下文又相類一從精義說至安身一從
身安溯及義精皆所以示動者以貞一之則也此言

凡人之動莫先于能知而知之最要尤在于知幾故知幾即不測之神也蓋君子之動不出乎上下之交上交易諂而能不諂下交易瀆而能不瀆非知幾其

孰能之

九四初六皆不正初交于四為諂四交于初為瀆六二以中正自守故不諂不瀆

夫

幾非他即四之震動而未形其兆甚微而順動之吉見于未動之先者也君子于此時已早見其兆作而趨之有不俟終日之久焉易之豫二曰介于石不終日貞吉夫人于理欲之介能見之堅確如石之不可

轉則其不俟終日而作斷然可識矣所以然者君子
自精義入神已无所不知其知微之為微而即知微
之為彰也其知柔之為柔即知柔之為剛也知幾如
此所由利用安身德極其崇而為萬夫之望也

象見
本爻

下

子曰顏氏之子其殆庶幾乎有不善未嘗不知知之未

嘗復行也易曰不遠復无祇悔元吉

復行狀
人切

于微而即知彰于柔而即知剛則知幾者難矣能近

于幾者其唯顏子乎

殆將也庶近也幾即動之微吉之先見也

顏子克復

功深少有幾微之不善未嘗不豫先而知之既已知之未有不勇決而去之此怒之所以不遷過之所以不貳也易復之初曰不遠復无祇悔元吉正顏子之謂也人之動而欲貞夫一者可不以是為法乎

天地絪縕萬物化醇男女構精萬物化生易曰三人行則損一人一人行則得其友言致一也

此與下節又即損之六三與益之上九一正一反示

人以貞一也上二節言知幾為萬夫之望而舉顏子

以証之則其德為已崇矣而究之德之所以崇非有

多也一而已耳如天位于上地位于下似判然為二

也然天道下濟地道上行其氣絪縕而凝結

損卦自泰而來

乾三交于坤上坤上交于乾三此天地絪縕之象

而萬物皆化而醇厚矣男

位于外女位于內似劃然為二也然男交于女女交

于男其體構精而融會

乾坤為男女上三周易為構精

而萬物皆化

而形生矣何也兩而化惟其一而神也易之損三曰

三人行則損一人一人行則得其友言兩相與則專
三則雜而亂欲其致于一也夫天地男女皆在一
人之動可以有二乎

子曰君子安其身而後動易其心而後語定其交而後
求君子修此三者故全也危以動則民不與也懼以語
則民不應也无交而求則民不與也莫之與則傷之者
至矣易曰莫益之或擊之立心勿恒凶

易以
致切

損之三所以欲致其一者以一乃人之恒心也故君

子身欲有所動而不遽動也必使此身順理而安然
後動焉心欲有所語而不遽語也必使此心和平而
易然後語焉于民有所求而不遽求也必使已與民
上下交孚而定然後求焉

象見本
久下

君子修此三者而

立心恒矣故動焉而民悅語焉而民應求焉而民輸

二與字上是許
與下是取與

故上下如一而全也

又辭言偏此處
言全意正相對

若事不順理而危以動令非和協而懼以語情非素
孚而无交以求民誰與之民既不與則上必怒而傷

之者至矣

向謂民之傷
上辨已見前

易之恒上曰莫益之或擊之

立心勿恒凶正此上下違心不一之謂也觀損之致
一與益之不一天下之動可知矣憧憧往來何為焉

右第五章

周易辨畫卷三十六

欽定四庫全書

周易辨書卷三十七

潁川連斗山撰

繫辭下傳下

子曰乾坤其易之門邪乾陽物也坤陰物也陰陽合德而剛柔有體以體天地之撰以通神明之德

極化勉切

前言天下之動在貞一而貞一之道則由於聖人之繫辭焉而命之而此一章則先言卦名也易有六十

四卦皆由乾坤二卦闔闢而成則乾坤二卦其易書

六十二卦往來之門邪

坤為闔戶乾為闢戶諸卦往來於二卦之中故擬之為門

蓋乾一而實陽物也坤二而虛陰物也

陰陽無形畫奇耦以象之

則有形故名為物

凡易中所具之陽物皆乾所具之陰物皆

坤也顧自其對待而言陽自為陽陰自為陰分之各

成一物而自其流行而言陽根於陰陰根於陽合之

則咸有一德惟其合德故相摩相盪而六十四卦三

百八十四爻剛柔遂皆有體由是顯而天地之撰

撰具

也如天地雷風水火山澤之類

有此體足以體之而形容其似微而

神明之德

如健順動入麗
臨止悅之類

有此體足以通之而發揮

其蘊此所以為易之門也

其稱名也雜而不越於稽其類其衰世之意邪

於音
烏

六十四卦一卦各有一名或假諸物或明其理或指

其事可謂雜矣然名與卦符未嘗出於體撰通德之

外雖雜而不雜也於歎辭稽其類有淑又有慝有善

又有惡上古之時殆未及此其衰世偷薄之意邪

夫易彰往而察來而微顯闡幽開而當名辨物正言斷

辭則備矣

夫音扶闡昌善切當得浪切斷丁亂切

夫易之稱名如此其所關豈淺鮮哉天地之已然曰
往易則有以彰其消息之定理人事之未然曰來易
則有以察其吉凶之先兆日用所為者顯也易則揲
原於幽渺而微之百姓不知者幽也易則徵驗於形
迹而闡之易之具於卦畫者已至矣又復開人之愚
昧而示之以名其名與卦為至當或假物以名其象

如鼎與井之屬而象有必辨或正言以名其理如否
與泰之類而理无或偏或斷辭以名其事如訟與需
之類而事无不宜即一名而亦无所不備也

此章統論卦名

未及卦辭觀章內三提名字可知
故辨物正言斷辭皆指卦名說

其稱名也小其取類也大其旨遠其辭文其言曲而中
其事肆而隱因貳以濟民行以明得失之報

中如字行
下孟切

然亦不徒空示其名而已其當名也雖所稱之名專
在一事為甚小而取類於陰陽包羅萬象則甚大唯

其大甚故觀其名於所斷之辭其旨若遠而難測而
其辭則文而昭著也再觀其名於所正之言其言雖
偏曲而不廣而其理則中正而无偏也至所云辨物
之名者物也亦事也其事雖縱肆而无紀而其道則
隱藏而有倫焉名卦之意所以如是其周且盡者豈
无故哉蓋因衰世之民心多懷疑貳民行每持兩端
罔知所濟故於羲皇有畫无文之卦各繫之以名以
明人之逆理而失者則有惡名之報人之順理而得

者則有美名之報如此則民之貳者釋而行者決矣

右第六章

易之興也其于中古乎作易者其有憂患乎

此章又承上章稱名而言所以示人以觀象之法也
凡彖傳每卦必先釋名義次釋德體末釋應用此章
錯舉九卦分列三層與彖傳正是一律欲學者玩此
九卦之名則諸卦皆可以類推也前言卦名之繫因
貳以濟民行以明得失之報蓋與民同憂共患之心

也然上古伏羲之時民風淳朴其為憂患也甚少故
三畫之卦其名雖有而六畫之卦名尚未命中古文
王之時世道衰微民之可憂可患者最多故聖人憂
之患之乃取六十四卦而名以命之其八純之卦則
仍其名而不改其五十六雜卦或究其義或因其體
或推其用各繫以名而易道以興蓋易者為憂患天
下而作也

向以易在羗里而作故以此章為處憂患
之事不知聖人樂天知命原無憂患聖人
之憂患以天下之憂患為憂患也故言此九卦以示
人人若有此九卦之德則可憂可患之事自絕豈但

可以處
之已哉

是故履德之基也謙德之柄也復德之本也恒德之固也損德之修也益德之裕也困德之辨也井德之地也

巽德之制也

柄兵
命切

聖人憂患天下以其吉不知趨凶不知避也然趨避之道不在於臨事之占筮而在於平日之進修故隨舉九卦之名以示其例如上乾下兌之卦名履人之修德其始必有所憑藉履卦之上天下澤定分不易

即修德者憑藉之基也

九德皆指剛以柔履剛柔爻在下故曰德之基

上地

下山之卦名謙人之修德其繼必有所操持謙卦之

裒多益寡稱物平施即修德者操持之柄也

坤為柄艮為手

以剛下柔故為德之柄

上坤下震者復也人欲全其天德之本

然不植其根則枝葉无自而生彼復之一元下始天

心可見非崇德之本乎

坤為地震為木木在地中故曰德之本

上震下

巽者恒也人欲保其天德之固然不堅其操則紛華

易喪其守彼恒之雷風相與立不易方非立德之固

乎

雷厲風行卓立不易故曰德之固

人欲修德害德者不可以不除

若如上艮下兌之損卦懲忿窒慾則害德者去矣是損乃所以修德也人欲裕德則畜德者不可以不備若如上巽下震之益卦遷善改過則畜德者備矣是益乃所以裕德也若夫上兌下坎之卦名困人當窮阨于德每患不能辨彼困之剛掩不失其所亨非德之辨歟

操心危慮患深故曰德之辨

上坎下巽之卦名井人在下

位施德每患于无地彼井之靜深養焉而不窮非德

之地歟

井養萬民地養萬物其義一也盧氏曰基與地有別基小而地大基是初起脚跟積累可

由此而上地是凝成全體施用之妙皆由此而出也

至于上巽下巽之卦仍名

為巽巽者柔順卑下而善入者也人不能深入乎義理處事何以能斷若巽之善入直如利刃之割正布帛隨其長短而皆能裁成于至當非德之制而能若

是哉

深入義理遇事能斷故曰德之制

履和而至謙尊而光復小而辨于物恒雜而不厭損先難而後易益長裕而不設困窮而通井居其所而遷巽

稱而隱

易以豉切長丁
大切稱尺正切

此節向止說得九卦之善而已今玩九句中各著一而字明明是合上下兩卦以釋一卦與諸卦彖傳一例合而証之自見上節以字義釋卦名此節以兩體釋卦名履卦兑悅于剛為和使和而失于流則非至矣而乾體剛健能不失于流是和而至也謙卦山高于地為尊使尊而為其所掩則不光矣而坤體卑順不能掩其高是尊而光也復卦一陽初生為小小則

亂于衆陰而難辨而坤體以順而行又何其能辨也
恒卦震為決躁必雜雜則擾于紛紜而生厭而巽體
委曲善入又何其不厭也損卦浚兌澤之深以上升
是為先難先難者其後必不易而艮體高出又何其
易乎益卦奮震動之才以進德自必長裕長裕者近
于虛設而巽入无疆又何至于設乎困卦坎陷于下
疑為窮矣而兌體和悅則窮而能通也井卦巽入于
下似居其所矣而坎體上行則居而能遷也至于巽

卦陰性善入能隨事以順理因時以制宜于德為稱
然其陽剛外覆又使人无形迹之可見稱而隱焉九
卦之體何其善哉

履以和行謙以制禮復以自知恒以一德損以遠害益
以興利困以寡怨井以辨義巽以行權

和行下孟切
遠于萬切

此節以九卦之用釋卦名德體于身者為行行易失
之乖戾則用履以和之德見于品節為禮禮易至于
嚴肅則用謙以制之擇善者入德之始事則用復以

自知而擇之固執者進德之終事則用恒以一德而
執之人欲德之害也用損以遠之焉天理德之利也
用益以興之焉不知命之當安未免怨天用乎困之
亨通則可以寡怨不知性之當盡不能徙義用乎井
之靜深則可以辨義此皆脩德之常經也若事當變
通不可以常經執者則用巽以行權即一卦名而其
為益已如此學者即其名而體驗之天下无憂患之
事矣

右第七章

易之為書也不可遠為道也屢遷變動不居周流六虛

上下无常剛柔相易不可為典要唯變所適

遠如字上時掌切

上二章言卦名此與下二章皆言卦爻而并及其辭

故三章皆以易之為書也句作起易之為書陰陽變

化最為難測人或疑其為遠不知其書祇為趨吉避

凶而作皆切于民生日用之常不可求之于遠也即

卦爻之書觀之而已在矣

向以遠作去聲謂其不可離義亦可通但與下文不

甚親切蘇氏軾謂其可以指見口授故雖易書之中不當索于文辭之外更與末節對卦

其為道也屢屢遷移不居一所周流于六虛之間

初二

三四五上為六位而六位之上剛柔上下交錯往來却无一定故為六虛或自上降下或

自下升上而无常或剛變為柔或柔變為剛而相易

不可執之為典常要領唯其无常相易變之所趨而

已道之屢遷固如此

前言卦名妙在雜而不越此言卦辭妙在變而有常此節乃開

說以起下文所以申不可遠之意謂是言易道之變化殊失本旨

其出入以度外内使知懼又明于憂患與故无有師保

如臨父母初率其辭而揆其方既有典常苟非其人道不虛行

然道雖屢遷而其自內卦而出于外自外卦而入于內皆有一定之法度非可以意為出入也

如初與四二與五三

與上剛柔相應始可以出入他爻不能出入不應亦不能出入故當其入則在外者

必不貞而得凶當其出則在內者必不當而取吝使人皆凜然懼之而不敢犯然亦不徒使懼而已又能明於事之可憂患與所以致憂患之故而提命諄切

使人无有師保之嚴憚直如父母之慈愛易辭之親切如此尚可於遠求之乎人于學易之初誠由彖爻

之辭而玩索之更于一定之方而揆度之

卦爻定例為方如下

卦所云是也

則道雖屢遷不可為典要而亦既有典而可

守有常而可循矣苟非切實體道之人謂辭為聖人

之糟粕而欲索之于玄渺虛无則道非辭不顯豈能

以虛行哉此所以不可求之於遠也

苟非其人二句向以人能弘道

為訓指其人為非神而明之之人與章意不貫

右第八章

易之為書也原始要終以為質也六爻相雜惟其時物也其初難知其上易知本末也初辭擬之卒成之終若夫雜物撰德辨是與非則非其中爻不備

要一遙切下俱同易以豉

切夫音扶

此章承上率辭揆方既有典常而言蓋示人以學易之法也易之為書也有彖有爻彖者材也推原于卦之所由始要歸于卦之所由終合全卦之義以為質

也質如義以為質之爻者效天下之動者也陰陽之

質如畫之有地也

位各三或以剛居剛以柔居柔為當位或以剛居柔

以柔居剛為不當位交錯雜陳則唯其隨時以為物

也

時謂初二三四五上之時
物謂陽奇陰偶二畫之物

是以前爻乃一卦之

緣起其體未成其理未著最為難知也以其為全

卦之本如觀木者在下之根本難見也其上爻則全

卦已竟之局其體已成其理已著較為易知也

其為卦之末如觀木者在上之枝葉易見也唯其難

知故聖人當日作易于初爻之辭猶煩推擬至于其

上之卒第因初爻之辭以成其終而已

或謂如乾初擬共陽在下

曰潛龍至于上則直謂之曰亢龍是固然已然六十
四卦中初爻多統舉全卦之旨上爻多摠收全卦之
義其難易又不
可以不知也若夫初上二爻之間雜居陰陽之時

物所以撰述八卦之德

如健順動入之類

辨別六爻之是與

非者也

中正則是非中正則非

苟非合中四爻正體互體而並

觀之則所以撰之辨之者不能備卦中之蘊也

如水雷屯

卦內有動之德外有陽之德此正卦之撰德也二四
互坤有順之德三五互艮有止之德此互卦之撰德

也如地天泰卦九居二六居五則非二應五五應二則是此正卦之是與非也二互四為兌各退一位三互五為震各進一位其中亦各有是非也即卦爻本辭取互者亦多如地水師卦二互為震六五則曰長子帥師長子者互震之二也地山謙卦三互為坎初爻則曰用涉大川大川者互坎之三也

噫亦要存亡吉凶則居可知矣知者觀其彖辭則思過半矣二與四同功而異位其善不同二多譽四多懼近也柔之為道不利遠者其要无咎其用柔中也三與五同功而異位三多凶五多功貴賤之等也其柔危其剛

勝邪

噫於其切知者音智思息吏切勝音升

夫質也時物也初上與中爻也其典常已歷歷如睹
矣豈必待彖爻之辭而後可知哉噫亦惟要求于卦
畫之中凡天道之盈虛為存亡人事之得失有吉凶
則即其剛柔所居之位或正或否亦略可知矣况彖
爻之辭又如是其彰明較著乎故知者不但備觀于
六爻之辭第觀于彖卦之辭而趨吉避凶之思已過
其半焉蓋彖為綱爻為目綱舉則衆目張彖為權爻
為物權審則物數定其理然也

如屯以初為候蒙以
二為師之類彖辭已

渾括其象爻辭特實指其爻夫子於象象傳中已逐卦以示人矣于此又撮其要而切言之而解易者猶謂文王有文王之易周公有周公之易孔子又有孔子之易何也

然而天下之知者能有幾人則夫雜物撰德辨是與非之中爻誠不可以不備也試以正體與互體言之二與四皆陰皆能為順承之業其功同也而所居之位一內一外則有異唯有異故其善亦異二多譽四則多懼何也近君者有逼上之嫌四唯近五故戰兢而多懼也柔之為道非依剛不能自立似不利于遠二遠于五其要歸反

得以无咎以其用柔得中君臣合德故也三與五皆陽皆能立剛大之業其功亦同也而所居之位一上一下則有異唯有異故三則多凶五則多功何也五為君而貴乾綱獨握三為臣而賤職无專成其等然也此二位者大抵以柔居之則不稱量而危厲以剛居之則克勝任而吉亨也此皆易之典常可近取而不可遠求者也

按柔危剛勝二句諸講多有回護或謂指三或謂指五或謂三五並指更

有謂合二四三五而均指之者其意總因卦中六五多柔而不危故耳不知卦中凡六五吉亨之占俱以應

爻此爻相易言非本爻自有
此占也辨已見于卦爻辭中

右第九章

易之為書也廣大悉備有天道焉有人道焉有地道焉
兼三才而兩之故六六者非他也三才之道也道有變
動故曰爻爻有等故曰物物相雜故曰文文不當故吉

凶生焉

當得
浪切

前章於一卦六爻既分而釋之故此章於一卦六爻
復合而贊之易之為書也真廣无不容大无不包纖

悉无所不備也蓋大生莫如天道而乾能大生是天之道易書有之焉纖悉莫如人道而中爻能備纖悉是人之道易書有之焉廣生莫如地道而坤能廣生是地之道易書有之焉此三者以其體而言則曰三極以其用而言則曰三才也然使三才各一則獨而无對天亦不生地亦不成人亦混淆而不分必兼此三才而兩之天人地各有一陰陽然後其道全而不偏故易於三畫之卦重而為六也夫六豈有他道哉

猶是初二為地三四為人五上為天三才之道而已
是道也非固執而不化拘守而不移者也又各有其
變動焉如前所云剛柔相易即變也上下无常即動
也變動多因于彼此之相交故名曰爻然爻又非混
雜而无紀又各有其等如前所云三五異位則貴賤
之等也二四異位則遠近之等也等因於奇耦之定
體故名之曰物然物以等而分亦以雜而亂或為奇
畫之陽物或為耦畫之陰物二物相雜於六位之中

如玄黃之色間則名之曰文使文而各得其當則有吉无凶吉凶亦无自而生惟同此文而有陽或居於陰陰或居於陽之不當則當者有得不當者有失而吉凶生於其間於是乎聖人有辭矣故下文遂專言

聖人之辭

諸家多謂不當不以爻位言其意蓋以卦中亦有當位而不吉不當位而反吉者不

知天下之動貞夫一當位即貞不當位即不貞貞者必吉不貞者必凶无二理也卦中所言或指剛柔相易或是上下相應或是辭在本爻義在他處細心思之自見不得執文字以求易也

右第十章

易之書也其當殷之末世周之盛德邪當文王與紂之事邪是故其辭危危者使平易者使傾其道甚大百物不廢懼以終始其要元咎此之謂易之道也

易以取切要一遙切

上三章言卦爻而結之以吉凶生吉凶者聖人所繫之辭也故此章遂言聖人之辭易道之興以時當殷

末世周盛德之時以事則文王與紂之事也

如小畜與履師

與比等卦是也

惟其時事若此故天下之人皆習于盤樂怠

傲有吉而不知趨有凶而不知避聖人憂之故其所

繫之辭皆危悚之辭其有以危亡存心者理當得平

辭即繫之以吉若使之平其以慢易存心者理當致

傾辭即繫之以凶若使之傾

上危字以卦辭言下危字以人心言合兩使字

正見可危處

其道无所不有包藏甚大近而一身酬酢遠

而天下國家凡百事物无有外此而廢之者聖人為

此不過欲人懼以終始常以危亡為慮勿以慢易為

懷歸於无咎而已此易辭教人之道也夫子以詩教

人曰无邪以易教人曰无咎无咎由于无邪无邪求

其无咎其意一而已矣

右第十一章

夫乾天下之至健也德行恒易以知險夫坤天下之至

順也德行恒簡以知阻能說諸心能研諸侯之

侯之二
字朱子

以為衍文然前人竟有作諸
侯解者按之无理宜從朱子

慮定天下之吉凶成天下

之亹亹者是故變化云為吉事有祥象事知器占事知

來天地設位聖人成能人謀鬼謀百姓與能

夫音扶行
下孟切易

以豉切說音悅亹

亹偉切與音預

此亦合上十一章而通論之見卦又祇此乾坤乾坤
祇此易簡欲人就易簡之歸以出險阻之途也與上
繫傳首章自乾坤收歸易簡意遙遙相對言易首乾
坤以乾坤為易之門戶凡卦中所陳列者不過乾坤
兩畫也以兩畫而遂括易書之全何以能然哉蓋乾
不徒健乃天下之至健也至健故其德之見于行者
恒易而无難而人世危險之情其易者可以知之也
坤不徒順乃天下之至順也至順故其德之見于行

者恒簡而不紛而人世阻塞之端其簡者可以知之

也

夫乾夫坤諸家俱作聖人說吳氏澄則作天地說各有所見從无作易書者其意蓋謂下文乃作易

之事此處未可預侵也不知此章乃摠收全傳惟易以示人此四句乃通章之提綱正宜就易書說

簡可以知險阻故其理深入乎人心而能使人悅諸

心其道曲中乎人慮而能使人研諸慮天下有吉凶

未明者得此易簡則可以定之而不迷天下有趨避

未決者得此易簡則可以亶亶焉成之而不倦易簡之

為用有如此者故乾坤之變化皆易簡之變化也人

能以易中之變化為云為則云為悉易簡之善其事

自然吉而足以致祥舉凡理之有定而為器者比擬

于已往象事而可以知其器事之未形而為來者推

驗于將然占事而可以知其來此所以前之聖人乾

天坤地于六爻設其位

謂伏羲
畫卦

後之聖人觀象繫辭

以卜筮成其能

謂文周
繫辭

于是天下之衆既謀及人以

質其是否更謀于鬼以決其從違雖百姓之愚皆得

與聖人之能矣

蔡氏清曰凡卜筮問易須先謀諸人
然後乃問易雖聖人亦然故洪範謀

及卿士謀及庶人
然後曰謀及卜筮

八卦以象告爻象以情言剛柔雜居而吉凶可見矣變動以利言吉凶以情遷是故愛惡相攻而吉凶生遠近相取而悔吝生情偽相感而利害生凡易之情近而不相得則凶或害之悔且吝

惡鳥路切

夫百姓何以與聖人之能以聖人之易書所以開示天下者至明且盡也蓋易簡之理與險阻之情无形而難測聖人仰觀俯察畫為八卦立為象以告之又

說心研慮繫為爻象推其情以言之夫以象告則象中之剛柔雜居其為得為失吉凶已昭然可見矣而聖人又以情言之者以卦象之中其剛柔之變動不勝窮而吉凶亦因之有異也蓋剛柔雖雜居而剛柔之相易又有變上下之元常又有動其所以必變與動者乃以利言也如利有攸往利涉大川之類是也既有所利則凶亦可之乎吉吉亦可之乎凶但象中吉凶雖可見而吉凶因變動之情而遷者殊不可見

也聖人與民同患安得不繫之辭哉是故卦象之中
有兩情相合者為愛有兩情相睽者為惡愛與惡相
攻則為易為簡而吉之辭于是乎生焉惡與愛相攻
則為險為阻而凶之辭于是乎生焉然吉凶者理之
已定者也相攻者情之已極者也而吉凶之前不有
悔吝乎相攻之前不又有相取乎故卦象之中其不
比不應者是遠者也其有比有應者是近者也當近
者而反取乎遠則失其易簡而悔之辭又生焉當遠

者而反取乎近則行乎險阻而吝之辭又生焉雖然天下未有所感而取焉攻焉者則攻取之來又起于相感彼夫卦象之中其感以情而无偽者是易簡之公也其感以偽而无情者是險阻之私也感出于公者利感出于私者不利利害之辭不又于是而生哉凡此者皆吉凶之因情而遷者也要之易之為卦雖六十有四為爻雖三百八十有四卦與卦異爻與爻殊究之凡易之情不過取其剛柔之相得而已若

有比有應近而能相得其為吉不待言矣若當比當
應近而不相得則背乎易簡履乎險阻大則必凶次
或有害即无凶害亦必有悔與吝爾若夫无關比應
之遠者既无相得亦不至于不相得則辭皆從略焉
此繫辭之大旨也

將叛者其辭慚中心疑者其辭枝吉人之辭寡躁人之
辭多誣善之人其辭游失其守者其辭屈

誣音無

夫吉凶悔吝利害聖人之辭若是其詳者何也蓋聖

人之辭一準乎卦象之情而卦象之情又一準乎天下之情不如此不備也試以天下之情發諸辭者言之如將背乎易簡之理者其中媿其辭必慚心疑乎易簡之理者其中猜其辭必枝

枝即樹枝之枝言其分歧也

吉祥

之人渾乎易簡之理其中靜其辭必寡踈妄之人反乎易簡之理其中浮其辭必多誣任易簡之理以為已之善其中虛其辭必游而鮮據失其易簡之理而无所守其中歉其辭必屈而不伸人之辭有此六者

而卦象之愛惡遠近情偽適與之相準聖人之繫辭
其吉凶悔吝利害又安得不與之準哉雖然吉凶悔
吝與利害雖有六其實不過期人共歸于一貞而已
故曰易簡而天下之理得矣天下之理得而成位乎
其中矣此聖人作易之要旨也

右第十二章

周易辨畫卷三十七